

## Uunga

## Allannguutissatut siunnersuut

**Uunga siunnersuut: Aningaasarsianit akileraarutit pillugit Inatsisartut inatsisaata allanngortinneqarnera pillugu Inatsisartut inatsisaat nr. xx, xx. xxx 2016-imeersoq**

Pingajussaaneerneqarnissaanut Naalakkersuisunit saqqummiunneqarpoq.

**§ 2-mut**

1. § 2-mi imm. 2-7-tut nutaatut ilanngunneqassapput:

” Imm. 2. Piffissami 2017-imit 2021-mut, soraarnerussutisiaqarnissamut, taakku § 39 a, imm. 1 aamma 2-mut piumasaqaatinut taaneqartunut naapertuuttuni, akiliinermi Namminersorlutik Oqartussat tapiissuteqartassapput.

Imm. 3. Tapiissutit, tiguisisunut akileraaruteqaataasussat, soraarnerussutisiaqarnissamut aamma inuunermut sillimmasiissutitut aaqqiissutitut, soraarnerussutisiaqarnissamut aningaasaateqarfimmi imaluunniit inuunermut aamma soraarnerussutisiaqarnissamut sillimmasiisarfimmi, Kalaallit Nunaanni angerlarsimaffeqanngitsumi, akileraarusigaanngitsumik akilerneqarsimasunit, ukiuni 2017-imit 2019-imut 5 procentpointiussapput kiisalu ukiuni 2020 aamma 2021-mi 3 procentpointiussallutik. Piffissami 2017-2019-imut tapiissut qaammammut inummut ataatsimut annerpaamik 420 kr.-ussaaq. Piffissamilu 2020-2021-mut qaammammut annerpaamik 250 kr.-ussalluni.

Imm. 4. Tapiissutit inunntut, 31. december 2016-imi tamakkiisumik akileraartussaataasunut kiisalu § 39 imaluunniit § 41, imm. 2, naapertorlugu 2016-imi soraarnerussutisiaqarnissamut aningaasaateqarfimmut imaluunniit inuunermut aamma soraarnerussutisiaqarnermut sillimmasiisarfimmut Kalaallit Nunaanni angerlarsimaffeqanngitsumut akiliinermi, ilanngaatigineqarsinnaasunik imaluunniit sulisitsisut akileeqaataassutaanik ilanngunneqartussaanninnerannik ilaasimasunut tunniunneqassapput.

Imm. 5. Tapisinnaatitaaneq atorunnaassaaq inuk Kalaallit Nunaanni tamakkiisumik akileraartussaajunnaarpat.

Imm. 6. Namminersorlutik Oqartussani, taakkulu suliffeqarfiini ataaniittuni kiisalu kommunini atorfilinnut, tapiissutit atorfillip akissarsineranut atatillugu akilerneqartassapput.

Imm. 7. Inuk tapiissutit pisinnaatitaasoq, kisiannili imm. 6-imi ilaanngitsoq, ukiup tulliani piffissami 1. juli-imit 30. september-ip tungaanut, akileraartarnermut ingerlatsivimmut elektroniskimik qinnuteqarsinnaavoq, ukiup siuliani akiliinermut tapiissutit piumalluni. Akileraartarnermut ingerlatsivik tapiissutit tunniunneqarnissaannut sukumiinerusumik piumasaqaateqarsinnaavoq, matuma ataani uppernarsaatit piumasaqarsinnaalluni.”

## Siunnersuummut nassuiaatit

### Nassuiaatit nalinginnaasut

#### 1. Aallaqqaasiut

UPA2016/21-p – Uunga siunnersuut: Aningaasarsianit akileraarutit pillugit Inatsisartut inatsisaata allangortinneqarnera pillugu Inatsisartut inatsisaata aappasaaneerpeqarnera pillugu Aningaasaqarnermut Akileraartarnermullu Ataatsimiititaliaq 20. maj 2016-imi isumaliutissiissummik saqqummiussivoq. Ataatsimiititaliami amerlanerussuteqartut Naalackersuisunut qinnutigisimavaat inatsisissatut siunnersuummut allannguutissatut siunnersuummik saqqummiussisoqassasoq.

Aningaasaqarnermut Naalackersuisoqarfiup 29. april 2016-imi oqaaseqaataa, ataatsimiititaliap apeqqutaannut Naalackersuisut akissutaanni 16. maj 2016-imeersumi ilanngussatut ilanngunneqartoq, allannguutissatut siunnersuummi matumani tunngavigineqarpoq.

#### 2. Inatsisissatut siunnersuutip pingaarnersai

Innuttaasut 2016-ip naanerani Kalaallit Nunaannut akileraartussaataasut, nunami allami soraarnerussutisiaqarnissamut aaqqissuussinermiittut, matuma ataani qallunaat nunaanniittuni, soraarnerussutisiaqarnissamut suliffeqarfinni aammalu 2016-imi aaqqiissummumut akiliinerminni ilanngaatigineqarsinnaasunik imaluunniit sulisitsisut akileeqataassutaasa ilanngunneqartussaanginneranni ilaasut allannguutissatut siunnersuutip taarsiivigissavai.

Inuit ikaarsaarnermik aaqqiissummi ilanngunneqartut, soraarnerussutisiaqarnissamut aaqqissuussinermut ilaasumut akileraarusiinani akiliinerisa procentiinik tunngaveqartumik ukiuni tallimani tapisiasarnissamut pisinnaatitaassapput. Tapisiat akileraarusigassapput.

Tapisiassat ima isikkoqarput:

Ukioq:	2017	2018	2019	2020	2021
Tapisiassat:	5 %	5 %	5 %	3 %	3 %

Aningaasannanniarluni soraarnerussutisiaqarnissamut akiliisarnerit annertusineqarnissaat, taamaasillunilu nunatta karsiata akiligaanik tapisianik amerlanerusunik pisarnissaq pinaveersaartinniarlugu, siunnersuutigineqarpoq, ukiuni pingasuni siullerni tapisiasat annerpaamik qaammammumut 420 kr.-iussasut, ukiumut 5040 kr.-ullutik. Ukiuni 2020-2021 tapisiasat annerpaamik qaammammumut 250 kr.-ussapput, ukiumut 3000 kr.-ullutik.

Tamakkiisumik akileraartussaataaneq atorunnaarpat tapisiaqarsinnaaneq atorunnaassaaq.

Pisortani atorfeqartut ingerlaavartumik akissarsisarneranni, ileqqaartut ataasiakkaat soraarnerussutisiaqarnissamut aaqqiissutaannut toqqaannartumik tapiissutit ikineqartassapput.

Aaqqissuussineq tamanna innuttaasunut pisortani atorfeqanngitsunut periarfissaanngilaq. Tamannalu pillugu, ukiumut ataasiarluni, tapiissutit tiguniarlugit akileraartarnermut ingerlatsivimmut elektroniskimik qinnuteqartoqartassaaq. Tapiissutisisut innersorneqassapput soraarnerussutisiaqarnermut aaqqissuussaminnut tapiissutit tigusatik kajumissutsimik immikkut akiliutit akiliutigisassagaat. Kisiannili tapiissutit soraarnerussutisiaqarnissamut aaqqissuussinermut akilernissai innuttaasup nammineq aalajangissavaa.

*Tapiissutit kisinneqarnerinut assersuutit:*

Assersuusiorluni kisitsinerni 2016-imi akileraarutit qaffasissusaat atuuttut tunngavigalugit kisitsisoqarpoq.

Assersuut 1	
Inuk A Kommuneqarfik Sermersuumi najugalik	
Soraarnerussutisiaqarnissamut aaqqiisummut ilaasumut 2017-imi akiliutit	
Soraarnerussutisiaqarnissamut aaqqiisummut akiliutit akileraarusernagit	100.000
Soraarnerussutisiaqarnissamut aaqqiisummut akiliutit akileraareerluni	58.000
Tapisiat, 2017, 5 % 100.000-nit (0,05 x 100.000)	5.000
Akileraarut 42 %, 5.000-init	2.100
Akileraareerluni tapisiat	2.900

Matumani inuk akileraarusernagit 5.000 kr.-nik tapisinissaminut pisinnaatitaassaaq, akileraaruseereerluni tapisiat 2.900 kr.-ussapput.

*Akiliutinik akileraaruserneqanngitsunit akileraarusernikunut naatsorsueqqinneq*

Tapisiat akileraarusernagit soraarnerussutisiaqarnissamut aaqqissuussinermut akilerneqarneri tunngavigalugit naatsorsorneqarput. Taamaattumillu akiliinerit akileraaruserneqarputa, akileraarusiinani annertussusaat paasiniaanni, naatsorsueqqittoqassaaq. Matumani apequtaassaaq, piffissami akiliiffimmi akileraarutit ataatsimut qaffasissusaa, tassungalu apequtaassalluni tapisisoq kommunimi sorlarmi akileraartussaataansooq.

Ima naatsorsueqqittoqassaaq:

$$\frac{1}{1-X} = \text{Naatsorsueqqinneq}$$

Akiliinermi kommunimi akileraarfimmi akileraarutit procentia ataatsimut 'X'-iuvoq. Assersuutigalugu Kommuni Kujallermi akileraarut 2016-imi 44%-iuvoq. Taamaattumik aningaasat  $1/(1-0,44) = 1,785714$ -imik amerlisarneqassapput, aningaasat akileraaruseereernani amerlassusaat paasiniallugu.

Assersuut 2	
Inuk B Kommune Kujallermi najugalik Soraarnerussutisiaqarnissamut aaqqiissummut ilaasumut 2017-imi akiliutit	
Soraarnerussutisiaqarnissamut aaqqiissummut kajumissutsimik akiliineq (akileraaruseereerluni)	56.000
Akileraaruseereernani akiliutit paasiniarlugit naatsorsueqqinneq (1,78 x 56.000)	100.000
Tapisiat 100.000-it 5 %-erivaat (0,05 x 100.000)	5.000
Akileraarut (5.000-ip 44 %-ia)	2.200
Akileraaruseereerluni tapisiat	2.800

Matumani inuk B akileraaruseereernagit 5.000 kr.-nik tapisinissaminut pisinnaatitaassaaq, akileraaruseereerluni tapisiat 2.800 kr.-ussallutik.

### 3. Inatsisissatut siunnersuutip aningaasaqarnikkut kingunerisassai

Ikaarsaariarnermi aaqqiissut naatsorsuutigineqarpoq ukiuni siullerni pingasuni Namminersorlutik Oqartussanut ukiumut 4,2 mio kr.-nik ilanngaaseereerluni aningaasartuutaasassasoq. 2020-2021-mi naatsorsuutigineqarpoq ilanngaaseereerluni aningaasartuutit ukiumut 2,8 mio. kr.-nut appariassasut. Ilanngaaseereerluni aningaasartuutaasussat pillugit apeqqutaassaaq, qassit aaqqiissummik atugaqassanersut.

### **Allannguutissatut siunnersuummi aalajangersakkat ataasiakkaat nassuiarneri**

Nr. 1.-imut

Imm. 2-mut.

Taamaallaat soraarnerussutisiaqarnissamut aaqqiissutit § 39 a, imm. 1. aamma imm. 2-mi ilaasut, taamaallaat soraarnerussutisiaqarnissamut aaqqiissutinut akiliinerit tapiissuteqarfigineqassasut, 1. januar 2017-imit akiliinerit akileraaruserneqarsimappata.

Ikaarsaariarluni aaqqiissut ukiunik 5-inik sivilissusilerneqarpoq.

Imm. 3-mut.

Ukiumut tapiissutit annertussusii aalajangersakkamik aalajangerneqarput. Tapiissutit ukiut 3-t qaangiunnerani annikillissapput, 2021-milu atorunnaassallutik. Aalajangersakkamittaaq aalajangerneqarpoq tapiissutit qaammammut annertunerpaaffissaat. Annertunerpaaffik piffissami 2020-2021-mut annikillisinneqassaaq.

Taamatuttaaqaq aalajangersakkami erseqqissarneqarpoq, ikaarsaariarluni aaqqiissut soraarnerussutisiaqarnissamut aaqqiissutinut, soraarnerussutisiaqarnissamut suliffeqarfinnut nunami allaniittunut akiliinerit taamaallaat pineqartut.

Imm. 4-mut.

Siunnersuutigineqarpoq, ikaarsaariarnermi aaqqiissummut ilaanissamut, piunasaqaatigineqassasoq inuk 31. december 2016-imi tamakkiisumik akileraartussaataassasoq. Taamatutaaq tapiissutisinissamut piunasaqaataassasoq, inuk 2016-imi soraarnerussutisiaqarnissamut aaqqiissummut akiliinermi ilanngaatigineqarsinnaasunik akiliisimasoq imaluunniit sulisitsisut akileeqataassusaanik ilanngunneqarsimannngitsut. Inuit 2016-imi soraarnerussutisiaqarnissamut aaqqiissuussinermut nunami allamiittunut akiliinerni ilanngaatigineqarsinnaasumik akiliisimannngitsut imaluunniit sulisitsisut akileeqataassusaannik ilanngunneqarsimannngitsut, ikaarsaariarnermi aaqqiissummut ilaassanngillat, aamma Kalaallit Nunaanni 31. december 2016-imi tamakkiisumik akileraartussaataasimagaluarunilluunniit.

Imm. 5-imut.

Siunnersuutigineqarpoq, Kalaallit Nunaanni tamakkiisumik akileraartussaataasogarunnaarpat, tapiissutisisinnaaneq atorunnaassasoq.

Imm. 6-imut.

Aalajangersakkami inuit taaneqartunut tapiissutit, inuit ataasiakkaat suliffeqarfeqarfimmi soraarnerussutisiaqarnissamut aaqqiissutaanut toqqaannartumik akilerneqartassapput. Aalajangersakkap tunngavigaa, tapisiap pisariitsumik akissarsialerivimmit nammineq suliarineqarsinnaammat. Tamanna akileraartarnermut ingerlatsivimmit suliarineqartussaagaluanik, tapisiassanik qinnuteqartunik ikilisitsissaaq.

Imm. 7-imut.

Siunnersuutigineqarpoq, ukiumut ataatsimut tapisiassat akileraartarnermut ingerlatsivimmut elektroniskimik qinnutigineqartassasut. Ukiup siuliani akiliutigineqartut pillugit, ukiup tulliani piffissami 1. juli-miit 30. septemberimut qinnutigineqartarsinnaassapput.